

Fida Nyamesemka: Mumu 12, 2014.

(Friday sermon –12th December 2014 – Fante Translation)

ANOHOBA MESIA (ANN) NE NOKWARDZI.

Nde Fida Nyamesemka no fa nsem kakra a osii wo Anohoba Mesia (Nyankopon Ne Nyhira Nka No) ne nkwa nda mu a Hazrat Musleh Maud akyerε mu dze reda apow ahorow a owo Anohoba Mesia (Nyankopon Ne Nyhira Nka No) ne nyhira nkwa no mu.

Wo Surah Yunus mu no Nyankopon aka asem a ofa N'akomhyefo hon nokwardzi ho de: '...Osipi de maatsena hom mu me nkwa nda nyinara ansaana iyi reba. Ono na ebenadze na oma hom nntse ase koraa?' (10:17)

(Wo Khilafat e Ahmadiyya a otsia ebien ne pen do no) Jama'at yi ne akomahyew etsiafo yε nyiemu wo Qadian a woyeyaww Anohoba Mesia (Nyankopon Ne Nyhira Nka No) no mbordo. Na hon tsir mu pow nye de wobeye ma basabasaye aba na onam Nyankopon N'adom ntsi hon enndzi nkunyim wo iyi mu. Naaso wokaa nsem a oye ayeyaa. Ekyir no, Hazrat Musleh Maud kasa wo nyiemu mu bi ase a oyii nsem a wokae tsie Anohoba Mesia (Nyankopon Ne Nyhira Nka No) ano na oma ngyinado a ofa Anohoba Mesia (Nyankopon Ne Nyhira Nka No) ne nokwardzi ho. Dza owo ase no ye dza oka wo ne kasa mu no ne fa kakra bi.

Anohoba Mesia (Nyankopon Ne Nyhira Nka No) no kor do bisaa Sikhfo, Hindufo na Muslimfo a na wowo ho ne ber do de obi botum aka asem kor mpo a otsia no wo ne bra a waboo no dadaa no mu anaa. Osipi de obiara ye dasefo wo ne bra a oboo dadaw no de noho tsew anaa ne koraakoraa no obiara enntum annka asem biara enntsia no fa iyi ho. Mpo otsianyi dzendzenndzen de Maulawi Muhammad Hussain Batalvi dzii Anohoba Mesia (Nyankopon Ne Nyhira Nka No) ne kronkronye ho dase wo ne buukuu mu na nkorfo binom so kaa de oye ohotsewnyi. Obesidan na obi a woye kronkron mfe eduanan aye effidze wo dakor pe mu? Nkorfo a wokwader wo nyimpa adwen mu kyere de suban bon ba obi mu nkakrankakra na subanpa nsee preko pe.

Nyankopon aka de: 'Mbre otse biara no Yeboa Hen Asomafo ...' (40:52). Hazrat Musleh Maud aka de wobo mbodzen biara de wobokum Anohoba Mesia (Nyankopon Ne Nyhira Nka No). Wodze asendzibea nsem a onnye nokwar boo no, hon mu kor nye asem a onnye nokwar a ofa no Martyn Clark no ku a nka obi roku no. Asem yi n'atsembuanyi no sii n'adwen pi de ne nsa beka dem nyimpa no a woka ato gua de oye Mesia no na obiara nntomm nkyer no no. Okowie ekyir no, dem tsembuanyi yi ara wo ewie no sii do kaa de asem no nnye nokwar na wobo asem no gui.

Maulana Umer Din Sahib, Ahmadiyyanyi Sofo a obeye Ahmadiyyanyi ber a nokwardzi gyinabew no sii pi maa no no aka de na ono nye nkorfo bi ridzi nkomboo fa mbre wobesi etsia Anohoba Mesia (Nyankopon Ne Nyhira Nka No). Hon mu kor kaa de Mirza Sahib aka ato gua de onkonye obiara bio mu; yento nsa mfre no wo mu. Se open do a yebeka de woetwa nkontompo ber a woka de onkonye obi biara enya na se woampen do a yebeye dede de woedzi nkungu. Maulana Umer Din kyeree n'adwen de oboko ekokum Anohoba Mesia (Nyankopon Ne Nyhira Nka No) no. Maulawi Muhammad Hussain Batalvi ka kyeree no de, abrantse, iyi nyinara waboo ho mbodzen dadaw. Iyi dze adwen behyee Maulawi Umer Din n'akoma mu de obi a Nyankopon bo noho ban dem yi mmfi bebiara ka Nyankopon ho. Obeye Bai'at. Ekyir no ohyiaa Maulawi Muhammad

Hussain wɔ bea bi a ɔbɛn Batala keteke gyinabea na obisaa no de ɔreyɛ dɛn wɔhɔ. Ber a ɔka kyereɛ no de wɔakɔ Qadian akɔyɛ Bai'at no Maulawi Muhammad Hussain kyereɛ n'ebufuw naaso Maulawi Umer Din yii n'ano de, Maulawi Sahib iyi nyinara sii ɔnam ɔwo ntsi.

Wɔ Datser Martyn Clark n'asendzebea asem mu no Maulawi Muhammad Hussain begyina mu de dasedzinyi tsiaa Anohoba Mesia (Nyankopɔn Ne Nyhira Nka No). Martyn Clark ka no wɔ asendzibea hɔ de Mirza Sahib somaa obi de obokumm no. Muslimfo taa n'ekyir na Maulawi Muhammad Hussain begyinaa mu de dasedzinyi. Nyankopɔn dzii kan ka kyereɛ Anohoba Mesia (Nyankopɔn Ne Nyhira Nka No) de Maulawi Muhammad Hussain beba hɔ na n'enyim bogu ase. Wɔ yikyere a ɔfa Maulawi Muhammad Hussain noho yi nyinara ekyir no ber a Anohoba Mesia (Nyankopɔn Ne Nyhira Nka No) ne ntamgyinafo no susui kyere no de wombisa Maulawi asembisa a obogu n'enyim ase no, Anohoba Mesia (Nyankopɔn Ne Nyhira Nka No) ammpen do ma woemmbisa asembisa no. Wɔdze nsembisa to nkorɔfo enyim wɔ asemdzibea dze ho nokwar na ber a Anohoba Mesia (Nyankopɔn Ne Nyhira Nka No) ne ntamgyinafo no kenkann nsembisa a wɔakyerew kyereɛ no de ɔpe de ɔdze bias Maulawi Sahib no, Anohoba Mesia (Nyankopɔn Ne Nyhira Nka No) kaa de ɔnnye adze a ɔbegye nsembisa bi ato mu. Wɔka kyereɛ no de ɔye ne yieye de wɔdze dem nsembisa no bɔto gua na obobubu etsiafo no hɔn asem naaso Anohoba Mesia (Nyankopɔn Ne Nyhira Nka No) enntsie dem nsembisa no. Anohoba Mesia (Nyankopɔn Ne Nyhira Nka No) ne ntamgyinanyi Fazal Din, na ɔye nyiyim wɔ Nyamesom mu naaso na ber nyinara ɔsɔer gyina ma Anohoba Mesia (Nyankopɔn Ne Nyhira Nka No) ɔnam ne nyimpa su ntsi na ber nyinara ɔkae de ne suban dzi mu wie peye na Maulawi biara nnyi hɔ a obotum dze noho atoto no wɔ dem asem no mu.

Wɔ afa kor no na Anohoba Mesia (Nyankopɔn Ne Nyhira Nka No) enya yikyere a ɔkyere de dasedzinyi no n'enyim bogu ase na wɔ afa kor so wɔammpen ma nsembisa a ɔtse dem no wɔammfa emmbisa dasedzinyi no. Nyankopɔn maa ne subanpa a ɔkrɔn no daa edzi na ɔkrɔn n'enyimnyam na ɔsan so fa kwan nwanwa do dze guu Maulawi Muhammad Hussain n'enyim ase. Ber a ɔtsembuafo a ɔsan so ye kandzinyi abedzi ekyir huu Anohoba Mesia (Nyankopɔn Ne Nyhira Nka No) n'enyim no onyaa nsesa wɔ n'akoma mu na ɔwo mu de na Anohoba Mesia (Nyankopɔn Ne Nyhira Nka No) reba asemdzibea hɔ abeyiyi nsem ano dze abɔ noho ban efi nsem a wɔdze etsia no naaso kandzinyi abedziekyir no maa no egua de ɔntsena ase. Dem ber nara so na Maulawi Muhammad Hussain bodur hɔ de ɔrobɔhwe (Nyame mpa ngu) Anohoba Mesia (Nyankopɔn Ne Nyhira Nka No) n'enyinguase, naaso nobu fuwee osiande mbom ohuu no de ɔtsena egua do. ɔkaa de ofi ebusua tsitsir ntsi ɔno so wɔma no egua ma ɔntsena do. ɔkaa de ber nyinara se ɔkɔ kɔsere kandzinyi no wɔma mo egua ma ɔtsena do. Kandzinyi abedzi ekyir no yii ano de se obi a ɔprapra famu mpo kesera obi a wɔma no egua ma ɔtsena do naaso iyi ye asemdzibea. ɔka kyereɛ Maulawi Muhammad Hussain de Anohoba Mesia (Nyankopɔn Ne Nyhira Nka No) fi ebusua a noho tsew mu.

Na ɔye nwanwa kakra ma Captain Douglas, Inresi kandzinyi abedziekyir no de n'akoma sesae ber a ohun Anohoba Mesia (Nyankopɔn Ne Nyhira Nka No) n'enyim. Na Captain Douglas ne ntsia no nnye ntsia keke; osipi de Nyamesom so ka ho bi.

Nda kakra ansaana asemdzibea da no ɔkaa de banyin fi Qadian a wɔaka ato gua de ɔye Mesia no na wɔaka etsia hɔn Nyankopɔn na ɔye no nwanwa siantsir a obiara nnkyerr no. Na ɔye nepe de ɔdze ne nsa behye kraataa ase etsia Anohoba Mesia (Nyankopɔn Ne Nyhira Nka No) naaso wotuu nofo de onnkotum aye dem ɔnam dem asemdzibea asem no ntsi na ɔnam do frɛe no wɔ asemdzibea hɔ. Ne dem ntsi no wɔdze nkratow kɔmaa Anohoba Mesia (Nyankopɔn Ne Nyhira Nka No). Ber a Anohoba Mesia (Nyankopɔn Ne Nyhira Nka No) dur asemdzibea hɔ dem da a wɔhyɛe no, dem kandzinyi abedziekyir a ɔkae na ogyina do de

wakasa etsia Yesu Kristo no, hyee Anohoba Mesia (Nyankopon Ne Nyhira Nka No) enyimnyam na aka kyeree no de obotum atsena ase ber a oriyi nsembisa ano. Na nyimpa dom pii na woehyia wo aboano ho. Ber a Maulawi Muhammad Hussain bodur ho na ohunn de Anohoba Mesia (Nyankopon Ne Nyhira Nka No) tse egua mu no nebo fuwee osiande n'adwen a odze bae nye de orobohwe de wodze abankawa bogu Anohoba Mesia (Nyankopon Ne Nyhira Nka No) ne nsa. Iyi ye asemdzibea a na Inglesinyi na otse egua mu na nyia a odze asem no bedan asemdzibea no so ye Inglesi Sofo, Datser Martyn Clark. Owo mu de na Datser Clark fi Pathanyi a awaree Inglesinyi n'ase naaso na wonyim no de oye Inglesinyi. Nyimdzifo tsede Maulawi Muhammad Hussain begyinaa mu de dasedzifo naaso Anohoba Mesia (Nyankopon Ne Nyhira Nka No) n'atamfo no dzii nkugu na hon enyim guu ase.

De mbre yeaka no dadaw no Maulawi Muhammad Hussain serere de woma no egua wo asemdzibea ho naaso kandzinyi abedzikeyir no ammpen do. Maulawi Muhammad Hussain hyee ase de oreham na ohyee kandzinyi abedzikeyir no ebufuw ma aka kyeree no de onko nkogyina bea wodze mpabowa gu wo ekyir ho. Peon no soo Maulawi Muhammad Hussain ne nsa na odze no kor bea a wodze asopatsee gu no. Maulawi Muhammad Hussain hun de nkorfo a wowo aboano no ho no botum ehu n'enyinguase gyinabew. Ohunn egua wo abranda mu ho na oye n'adwen de oboko abranda mu ho na wakotsena egua nodo wo ho. Ber a peon no hunn no no odwenn de kandzinyi abedzikeyir no nnkopen do ma dem ntsi aka kyeree no de omfi egua no do. Maulawi Hussain puei baa aboano bea a na nkorfo etwa ehyia wo ho na ebinom dze hon ntam asaw famu na wotsena do. Ohunn de kwan da tam kor do na oko tsenaa ho. Ber a tam no wura hunn no no osere no de omfi ne tam do ber a na oreka de otsena ne tam no do no woegu tam noho fi. Okasa tsiaa no de oye Maulawi naaso waba de orebetaa Kristonyi n'ekyir. Ne dem ntsi, woguu n'enyim ase wo beebiara, wo asemdzibea no mu na n'aboano nyinara. Iyinom ye Nyankopon Ne '...nsenkyeredze ahorow a oda edzi pefee ...' (2:100). Mbre Osi ma Anohoba Mesia (Nyankopon Ne Nyhira Nka No) ne tamfo yii no fii asem mu na oyii nsenkyeredze ahorow kyeree Captain Douglas a okae ara dze kor owu mu. Wo Hazrat Musleh Maud (Nyankopon N'enyi ngye noho) ne Ingresi nsrahwe mu wo afe 1924 no ohyiaa Captain Douglas.

Captain Douglas n'asemdzibea kyerewkyerewfo a na owo ho ber a na woridzi asem no aka de ber a wowie asem nara na Captain Douglas ka kyeree ne kyerekyerewfo no de onye keteke nhyehyee a odze rokoo Gurdaspur ma no. Na Captain Douglas nantsew ntentem wo kwan nodo na etum hu de biribi rehaw no. Kyerekyerewfo panyin no ka kyeree no de ontse famu wo bea a wotwen no naaso na ommpede de obiara ba ne nkyen na okaa de noho mmfa no. Ose fitsi ber a ohun Anohoba Mesia (Nyankopon Nyhira Nka no) Ne n'enyim no woenya atsenka tsede dza sorbofo eyi nsenkyeredze akyere no na waka de bon biara nnyi noho na noho soon, ne dem ntsi no opon asemdzibea dwumadzi no. Ose wo ho so ber a na orokoo sor ba ase wo kwan no mu no se odu ewie kor a ohun Mirza Sahib n'enyim na oreka kyere no de onnye hwee na oye ntor na woreka. Se osan so nantsew ko afa kor so a, ohun Mirza Sahib n'eyim bio mu a oreka de onnye hwee na ne nyinara ye ntor. Captain Douglas kaa de ohun de obobo dam se dem gyinabew yi ko do a. Kyerekyerewfo panyin ka kyeree no de onkotsena bea a wotwen no na okyere n'adwen de polis mpanyinyimfo no kor wo ho. Captain Douglas free no na aka atsenka a orinya no kyeree no. Polis panyin no kaa de oye Captain Douglas nara ne mfum de odze ne wir hyee Ekristofo asofo a wokyerewo no adze hon mu na ne nsem no nyinara gyina dza wakyerere no do. Polis panyin no kyere adwen de owo de wodze dasedzinyi tsitsir nara Abdul Hameed ma polisfo no na wonhwe asem a obeka. Captain Douglas dze ndzamba a ohia nyinara guu akwan mu na wodze Abdul Hameed hye apolisfo no hon nsa. Ahyease no na odaho gyina n'asem dadaw nodo na okaa de Mirza Sahib somaa no de

onkokum Dr Martyn Clerk naaso ekyir no ogyee to mu de orotwa ntor. Polisfo panyin no hunn de Abdul Hameed suro Ekristofo asofo no ntsi oka kyere no de wodze no boto fiadze na onkosan n'ekyir ako Ekristofo asofo no ho. Dem ber no na oka nokwar no.

Okaa de ber a na Ekristofo asofo no dze no refa nkyerakyere mu no oka kyere hon de ne wir befi edzin na dza okoka ho ntis wodze biriw kyere ehiasem no guu ne nsa ho. Ber biara a orebekasa no ohwe ne nsa ho na wabobo mbea mbea a okyere de Mirza Sahib somaa no de onko. Captain Douglas yii Anohoba Mesia (Nyankopon Nhyira Nka no) fi asem no mu ber a wosann tsena ase no.

Iyi nyinara ye nsenkyeredze a oda edzi na Captain Douglas dze woyii nsenkyeredze ne bi kaa ho kyere no ber a orenantsew wo kwan no do na ohun Anohoba Mesia (Nyankopon Nhyira Nka no) no wo afa ebien nyinara a oreka kyere no de noho soon. Captain Douglas ka kyere Hazrat Musleh Maud (Nyankopon N'enyi ngye noho) de dakor na Indianyi bi wo ne nkyen a oregye n'enyi wo nara ne fie na osree no de onka nsem soronko a esi wo n'abrabo nkyere no na oka dza ofa Anohoba Mesia (Nyankopon Nhyira Nka no) noho no. Ho nara na woka kyere no de obi pede ohu no. Ber a nyimpa no ba dan no mu no, Captain Douglas bisaa no de, abrantse owo nye wana? Abrantse no kaa de inyim m'egya, sofo Warris Din. Captain Douglas kaa de nyew, sesiara koraa na na mereka noho asem. Abrantse no kaa de sesiara na merenya nkra da woewu. Warris Din ye sofo a ohyee ase de oretsintsim dem nsem yi de obema Dr Martyn Clark n'enyi agye na odze asem no kor asemdzibea. Naaso, Nyankopon yii nokwar no kyere kandzinyi abedziekyir no na dasedzinyi tsitsir no so kaa to gua. Naaso, de Warris Din ne ba bodur Captain Douglas ne fie ber a oreka dem asem a osii no ye akwanhyiadze a oye nwanwa. Captain Douglas kaa iyi kyere Hazrat Musleh Maud (Nyankopon N'enyi ngye noho) na kopem da a owui no oka kyere Ahmadiyyanyi biara a ohyiaa no.

Hazrat Musleh Maud (Nyankopon N'enyi ngye noho) aka de ber a okorr Ingresi nsrahwe wo afe 1924 mu no na Captain Douglas tse apow yie. Naaso, wo ne nsrahwe a otodo ebien wo afe 1953 mu no odze kyepa bae a oreka de waye akokora na onntse apow a nantsew so ho ye ne dzen. Hazrat Musleh Maud (Nyankopon N'enyi ngye noho) dzii yaw de hyen nnyi ho a obotum akofa Captain Douglas aba anaa odze boko akohwe no wo afe 1953. Annkyer biara na owui.

Iyinom ye Nsenkyeredze a oda edzi a Nyankopon nam do dze da N'Asomafo no hon nokwardzi edzi. Gyedzinyi mbo mbodzen de obeye nokwar gyedzinyi na osipi de Nyankopon dze gynabew a obekenya nyimpa ne gyedzi se nyimpa no bo mbodzem wo nokwar mu de obeye nokwar gyedzinyi na osipi de enyigye a gyedzi nnyi mu biara nnyi ho tse de iyi. Eben mfaso na owo gyedzi mu de onnkobue nyimpa n'enyi na obema wako do atsena sum mu? Obi a onnyi enyiwa wo wiadze yi mu no nnkonya enyiwa wo Owuekyir. Obi a onnhu Nsenkyeredze a oda edzi wo wiadze yi mu no nnkohu bi wo Owuekyir.

Dem nsenkyeredze kwan yi kodo besi nde. Asem a yeaka no dadaw no sii mfe oha a etwa mu kor no. Nsenkyeredze no risi bio mu de Captain Douglas ne nana kor dze nkratow aba de ope de oye Bai'at. Oye no nwanwa de eben adze papa na ne nana banyin yee a orehye no nkuran dzendzennden nde. Yeatse asem a ofa Dr Martyn Clark ne nana nkansowa a okaa de ne nana nkansowa banyin na owo kwan a odzi mu do na Anohoba Mesia (Nyankopon Nhyira Nka no) ye nokwarfo.

Hazrat Musleh Maud (Nyankopon N'enyi ngye noho) aka de ber nyinara no nokwar gyedzinyi dze noho hye mpaebon na Nyankopon N'akaekae mu de mbre obohun da a Nyankopon beda Islam ne nokwar nye Onoara noho edzi akyere no na ohu Nkomhyenyi Kronkron (Nyankopon N'asomdwee na nhyira nka no) N'enyim a ohyren nye Nyankopon

N’abotar. Se nyimpa no nya dem suahun yi a ono adzekyee nye adzesaa nya afe no nyinara botum aye enyigye anaa onnkoye papa, ne nyinara ye adzekor dze ma no. Dza obesi biara no dem nyimpa a otse dem yi ber nyinara no n’enyi gye na onnsuro obi biara.

Wo Karam Din n’asemdzibea asem a odze tsia Anohoba Mesia (Nyankopon Nhyira Nka no) no a Hindu otsebuanyi na otsena egua mu no Aryafo no kaa gu n’aso mu de mbre otse biara no owo de otwe Anohoba Mesia (Nyankopon Nhyira Nka no) n’aso na ono so hyee bo de obeye. Na Ahmadiyyafo rodwen iyi ho paa na woka kyeree Anohoba Mesia (Nyankopon Nhyira Nka no) de onko Qadian bea a obenya banbo. Anohoba Mesia (Nyankopon Nhyira Nka no) kaa de onnkonya banbo a owie peye wo Qadian de wobotum dze kraataa ato gua dze abekyer no de owo Qadian anaa beebiara. Anohoba Mesia (Nyankopon Nhyira Nka no) kaa de wana na obotum dze ne nsa etsia Nyankopon N’awendadze! Wodze asemdzibea asem no too atsembuafo ebien hon enyim na hon ebien no nyinara na wonya hon asotwe; wotwee kor sensanee na kor ne ba nya adwen yarba na ohuree fi dan ne sor bobo famu kum noho.

Se nyimpa beye Nyankopon dze a wiadze no nyinara beye ne dze. De mbre woyi kyeree Anohoba Mesia (Nyankopon Nhyira Nka no) wo Punjabi kasa mu de: “gyee too meeraa hoo rahii sab gyag teeraa hoo” ‘Se ebotu woho ama me a, wiadze no nyinara beye wodze.’ (Tadhkirah, p. 609, 2009 edition) Biribiara nnyi wiadze yi mu a obotum ahaw wo. Tu woho ma Nyankopon na bo mpae de ebeye dem ara. Iyi dze asomdwee bebre wara na wo mba, w’anyenkofo nye w’ebusuafo so benya asomdwee. Owo de yekaa de kopem de Jama’at yi benya asomdwee no no mu mba nnkotum enya asomdwee na Jama’at no wo asomdwee mu ber a w’asefo wo asomdwee.

Hazrat Musleh Maud (Nyankopon N’enyi ngye noho) kae nda a ofa Dr. Martyn Clark n’asemdzibea asem noho. Na ohaw no na oboo mpae na onyaa daeso. Ose ohun de ofi skull aba fie na orobo mbodzen de obowura fie no mu naaso ohun polisfo pii a whyehye hon polis ntar wo ho. Hon mu kor siww no kwan de onnkoma woewura ne fie naaso kor so se oka ebusua noho ntsi oma no kwan. Ekyir no ohun dan a ohye fie n’ase a ne nana sii. Ohun Anohoba Mesia (Nyankopon Nhyira Nka no) de ogyina dem dan no mu a polisfo no dze aboa n’egyanan a wodze so gya egu mu na wodze ngu rogu egyan nodo de worebehew no. Hazrat Musleh Maud bo mbodzen de obodum gya no naaso polisfo no kyee no na wamma no kwan. Ho ara na ohun de wakyere no kase nye fefefew de: Wana na obotum ahyew Nyankopon Ne nkorfo a odo hon!

Banbo nye asomdwee wo ho ma nokwar gyedzifo wo dem wiadze yi nye Dankwama mu. Hazrat Musleh Maud (Nyankopon N’enyi ngye noho) aka de okaekae nsem a osii wo Anohoba Mesia (Nyankopon Nhyira Nka no) ne nkwa nda mu a na onnyi tum biara naaso Nyankopon tsintsim ne banbo.

Captain Douglas kaa de na ohaw no de asemdzibea asem no nnye nokwar ntsi ofa adwen bi na nokwar no daa edzi. Ekyir no okaa de onnhun nyimpa a owo abotar tsede Anohoba Mesia (Nyankopon Nhyira Nka no) da de ber a woka kyeree no de obotum dze asem etsia n’atamfo no Anohoba Mesia (Nyankopon Nhyira Nka no) bo gui.

Ber bi bae a na wonntsie Ahmadiyyafo ma wonko asordan mu wo Qadian, wototoww asordan n’abobow nyinara mu na wodze akwansewdze guu akwan mu de nkorfo a woro asor wo sum mu no bobo famu na wosiww Ahmadiyyafo kwan de mma wonko nsu bura no so ho. Dem nkorfo yi nyinara hen na woko! Hon mba beyee Ahmadiyyafo na nkorfo a na woper de wobenya Ahmadiyya efi ho no hon mba na woretserew mu dzendzennden. Anohoba Mesia (Nyankopon Nhyira Nka no) no kaa ne daeso bi a na okyere de na Qadian atserew ekodur Esutsen Beas na nyimpa aye ma woho tsitsir dze roko etsifi afa mu no. Naaso

ber a etwa mu kor no na Ahamadiyyafo hon adan a wo ho ye awotwe anaa du a hon ebusuafo wommfa bu mma hon. Ebinom bae de ahohow. Naaso nde Qadian etu mpon.

Nde onam Nyankopon N'adom ntsi no Qadian atserew na woesisi adan afefew a wogu risisi bi so a ebi ye ankorankora dze na binom so ye Jama'at dze de mbre yeye dasefo de Anohoba Mesia (Nyankopon Nhyira Nka no) ne kurow no rotu mpon. Ber etwa mu a na Hindu otsiafo bi a na ne fie nye Masjid Aqsa bo ebira taa ham na oka de mbofra hon dede haw n'adwen na nyimpa pii hyia wo ho dodow. Ber a wobue asordan no mu no bea a na oye ne fie no ka asordan noho sesiara.

Hazrat Musleh Maud (Nyankopon N'enyi ngye noho) kaa de ohun dem mber no a na nkorofu apow Anohoba Mesia (Nyankopon Nhyira Nka no) na nkorofu twee no na wototow boba bo no no. Okaa de nkorofu a wotse n'enyim no hon mu oha nkyemu edunum enum ye nkorofu a wotsiaa no naaso ekyir no wobekaa Jama'at noho. Okaa de wo Hazrat Khalifatul Masih a odzikan (Nyankopon N'enyi ngye noho) n'ekyi no, asem soerr wo Jama'at no mu, naaso dem nkorofu no hon ewiei nye den! Na onnsa hon enyi na wokaa de yennkotum aye nkowa ama abofra yi. Naaso Nyankopon dze dem abofra noho suro hyee hon akoma mu ara ma woguanee fii Qadian a hon annsan hon ekyir aba bio mu. Na wodze tu honho de Jama'at no mu oha nkyemu eduakron awotwe ka honho na oha nkyemu ebien pe na oka Khilafat ho. Naaso sesiara no oha mu nkyemu ebien mpo nnka honho na oha mu nkyemu eduakron awotwe ne mboree ka Khilafat ho.

Nde wo afe 2014 mu ber a na Fida Nyamesemka no rokoo do no nyimpa a na woehyia wo London no bor nyimpa a na Hazrat Musleh Maud (Nyankopon N'enyi ngye noho) kasae kyeree hon no. Osipi de Fazl asordan no mu nyimpa dem mpo bobor dzaa Hazrat Musleh Maud (Nyankopon N'enyi ngye noho) nye hon kasae no. Iyinom ye sunsum mu mboa nye adom ho nsenkyeredze soronko. Woye Anohoba Mesia (Nyankopon Nhyira Nka no) ne nokwardzi ho nsenkyeredze nye Sunsum mu mboa a ne Khilafat nsa ka. Ketseankye ber nyinara no yedze dem nsem yi boto hen adwen do na ketseankye obema hen gyedzi nye hen mba hon gyedzi ako sor!

Translated by: 1. Mr. Alhassan Kobina Atta-Wenchie
(Tutor in English Language, Jamiatul Mubashireen, Ghana)
2. Maulvi Alhassan Bashir Annan Sahib
(Tutor, Jamiatul Mubashireen, Ghana)
3. Rasheed Possible Essuman Sahib
(Final Year Student, Jamiatul Mubashireen, Ghana)
4. Hafiz Naseem Ahmad Nyame Sahib
(Composer, Second Year Student, Jamiatul Mubashireen, Ghana)

Downloaded from: www.jamiatulmubashireen.org
Contact: www.jamiatulmubashireen.org/contact-us